

Pesort lec'h evit sevenadur Breizh en ho kumun ?

1 –Diàr skiant-prenet e ouier pegen talvoudus eo kaout un den-dave evit Sevenadur Breizh, ur post hollret en ur chuzul-kêr evit heuliñ an teuliadoù liammet get yezh ha sevenadur Breizh. Ha anvet e vo genoc'h un « Den-dave Yezh ha Senevadur Breizh » e-pad ar leuradvezh da zont ?

Skipailh An Oriant a-gevret en deus divizet lakaat brezhoneg e pep lec'h er politikoù publik. Da lavaret eo ne 'vefe ket rannet an traoù etre sevenadur deus un tu ha sevenadur breizh deus un tu all. Met anat eo deomp e 'vo un den pe daou evit bezañ e darempred gant gevredigezhioù ha gevredigezhioù sevenadurel breizh dreist-holl.

2 - Ha grataat a rit difenn ha kas àr-raok ar brezhoneg e metoù ho kumuniezh-kumunioù, en ur ginnig anvadur ur c'huzulier kumuniezh e-karg a bolitikerezh ar yezh àr hon tiriegezh ?

A-du emamp penn-da-benn evit difenn krouidigezh ur politikerezh yezh er c'huzul kumuniezh. Ha perak ket ur bez-prezidant ? Re nebeut a youl ez eus bet 'pad bloavezhioù ha bloavezhioù evit ar brezhoneg. Ret eo ijiñ palioù resis ha tizhout anezho.

3 - Dre ar garta "Ya d'ar brezhoneg" kinniget get Ofis ar Brezhoneg <http://www.fr.brezhoneg.bzh/32-presentation.htm> e c'heller ofiselaat strivoù ar strollegezhioù a sav krog ar brezhoneg, ha gellet a raont ivez bout skoret a-fed teknik ha goustreud. Get pep strollegezh e vez dibabet an oberiantizoù a faot dezhi kas da benn evit tizhout unan ag ar pevar live talvoudekaat kinniget, ha dibabet e vez ivez an termen lakaet evit kement-se. 774 aozadur prevez, 208 kumun ha 14 strollegezh kumunioù o deus, hiriv an deiz, sinet ar garta-se e Breizh.

Ma voc'h dilennet, ha ma n'eo ket bet sinet c'hoazh ar garta get ho kumun, ha grataat a rit siniñ ar garta « Ya d'ar brezhoneg » ?

Mard eo bet sinet ar garta « Ya d'ar brezhoneg » get ho kumun, ha grataat a rit mont àr-raok ag ur live d'an nebeutañ e-pad ar leuradvezh ?

Sinet eo bet Karta live 2 gant Kêr An Oriant. Da gentañ ret 'vo sevel ur bilañs 'rak n'eo ket gwall sur eo bet graet pep tra. Deomp-ni n'eo ket mat bilañs an Aotrou Maer a-vremañ e keñver hor yezh. Dale zo gant An Oriant. C'hoant hon eus sinañ live 3 adalek penn-kentañ ar respetad. 'Michañs e 'vo tu mont pelloc'h met krediñ a reomp eo fur chom hep promesañ traoù forzh pegement. Hir eo evit ma vefe asantet gant an Ofis ul live. Met gouzout a reomp mat pegent mallus eo mont war-roak. Koulskoude hon eus ezhomm amzer evit bezañ gouest d'ober pezh emeon o prometiñ el lizher mañ. C'hoant hon eus lakaat brezhoneg er straedoù, er busoù, lakaat ar yezh da vezañ klevet ivez. Ha dreist-holl hon eus raktreset stummañ bep bloaz un nebeut tud gopred gant an ti-kêr e brezhoneg. Nompas 1 eurvezh bep sizhun met kas anezho 'pad 6 miz d'ober ur staj evit mont da vezañ gwir brezhonegerien. Hor pal zo 3 den stummet (ma 'z eus tud a-youl vat, Atsem pe get) bep bloaz. E-giz-se e 'vo aesoc'h sevel ur politikerek yezh youlek ha efedus. An dra-se a c'hall kas deomp betek live 4 met furoc'h eo prometiñ ul live 3 da gentañ.

4 – Hag en ho soñj emañ luskiñ pe sikour krouidigezh un hentenn divyezhek publik pe prevez, pe Diwan en ho kumun (*ma n'eus ket c'hoazh ag an hentennoù-se enni*) ?

Evit poent eo tro-dro 300 bugel skoliet e brezhoneg en Oriant. Re nebeut eo evit mirout niver an dud gouest da gaozeal brezhoneg er vro. Gant sikour Ofis publik ar brezhoneg hon eus ijinet e 'vefe mat tremen eus 300 betek 600. Da lavaret eo hon eus c'hoant digeriñ daou skol publik nevez ma vez ur goulenn sokial gant ar gerent. Un digarez e 'vefe ivez evit stabilaat niver ar bugel a za er skolaj. Plij a rafe deomp digeriñ un hentenn el lise warlec'h.

Klask a reomp ober muioc'h evel just met ret 'vo dija sevel un emgann gant ar Rektordi. Diwan 'vo sikouret rak laikerezh ha digoust eo met n'eo ket d'un ti-kêr da zibab pelec'h ma vez staliet Diwan pe get. Deomp-ni e 'vefe pouezus sevel un trede lec'h memes tra er vro. Sikouret 'vo gant hor skipailh. Raktreset hon eus ivez sevel ur magouri e brezhoneg ha goulennet 'vo ma vez lakaet en-dro un hentenn brezhoneg er skol-veur. Plij a rafe deomp e vefe An Oriant kerbênn ar Vroioù Keltiek evit gwir. Gant brezhoneg deus ar magouri betek ar Skol-Veur e 'vo aesoc'h da lavar-se !

5 – Petra a vo graet genoc'h evit ambroug kresk an hentennoù divyezhek publik pe prevez pe Diwan a zo en ho kumun ?

An aferioù skol en ti-kêr a dlefe kaout un emgav reoliek gant skolioù divyezhek pe dre soubidigezh evit kompren o kudenn pe o ezhommoù. Pedet 'vo Ofis publik ar brezhoneg ivez d'an emvodioù-se. An ti-kêr 'vo ur souten ma 'z eus ezhomm brezeliñ gant an Deskadurezh Stad pe ar Rektordi. Diwan ne 'vo ket ankounac'het ganeomp ha pep tra 'vo graet evit kaout darempredoù mat.

6 - Hag harpet e vo genoc'h ar c'hentelioù-noz brezhoneg en ho kumun ? (*prestiñ salioù, kehentiñ, kelaouiñ an dud hag all.*)

Dre-vraz hon eus divizet e 'vo gwellaet darempredoù gant ar gevredigezhioù. Skrivet eo 'barzh hor programm e 'vo graet pep tra evit ma vefe tu evito kaout salioù pe bodañ o izili en un doare aes. Deomp-ni eo pouezus e 'vefe bev buhez ar gevredigezhioù. Ma 'z eus ur goulenn sokial evit ar c'hentelioù-noz e 'vo kavet un diskoulm evit kavout ur sal bep sizhun. Ha diwezatac'h e 'vo savet ar c'hentelioù er Ti ar Vro a 'vo ijinet asambles.

7 – Get Emglev Bro an Oriant e vez kinniget atalieroù tañvat ar yezh er skolioù get ur c'hasour gopret. Hag harpiñ a raoc'h dre yalc'hadoù an argerzh deskiñ diazezoù ar brezhoneg kinniget get Emglev Bro an Oriant e skolioù publik ho kumun ?

Kinniget 'vo atalieroù e brezhoneg er « TAP ». Kudenn ebet. Kaset 'vo war-roak ar gevredigezhioù a souten implij ar yezh met ivez a ziskouez pinvidigezh sevenadur Breizh.

8 - Ma voc'h dilennet, ha lakat a raoc'h àr-sav ur panellerezh divyezhek hollek en ho kumun, ha grataat a rit degemer kentoc'h an anvioù lec'hel brezhonek, pe an dud vrudet a Vreizh evit anvadur an hentoù hag ar c'harterioù ?

Daou dra 'vo graet ganeomp e-keñver ar pannelloù. Da gentañ lakaat brezhoneg pa 'vez cheñchet anezho. Tamm-ha-tamm e vez brezhonekaet ar straedoù hep koust ebet. Betek-henn

e 'vo lakaet brezhoneg war pep lec'hioù publik hag er busoù ivez. Lakaet 'vo war-wel istor Breizh ha dreist-holl an toponomiezh. Istorioù ar c'harterioù 'vo displeget d'an dud. Studiadennoù zo dija n'int ket bet implijet. Ur vezh ruz eo. Un teñzor an hini eo ha ret eo deomp lakaat an teñzor-se de vezañ rannet gant an dud.

9 - An « Deizioù », « Tommder ar brezhoneg e kalon ar gouiañv e Bro an Oriant », savet get Emglev Bro an Oriant setu 35 blez 'zo, a ginnig etre miz Genver ha miz Meurzh, ur c'hant abadenn bennak hag a lak àr-wel sevenadur Breizh àr an holl tachenoù : sonadegoù, festoù-noz, atalieroù broderezh, keginerezh, dañs, arvestoù, diskouezadegoù, prezennoù, kenstrivadegoù, stajoù a bep sort, c'hoariva... Ma voc'h dilennet, petra a vo graet genoc'h evit ambrog ha brudiñ an Deizioù ?

Kendelc'het 'vo hor soutenn evit an Deizioù. Skignet 'vo ar programm 'barzh Lorient Mag ivez. 'Pezh a blijfen deomp eo ma vefe posubl evit gevredigezhioù 'zo implij ekipamentoù publik evel « Le Grand Théâtre », ar « CDDB » pe an « Hydrophone ». Da skouer e vezomp sur a-walc'h e vefe leun chouk sal ar C'hoariva braz ma 'vez kinniget bagad An Oriant un arvest. Perak n'eo ket bet kinniget dezho morse ?

10 –Petra a vo graet genoc'h evit harpiñ ar c'hevredigezhioù a ra àr-dro sevenadur Breizh en ho kumun (sonerezh, kan, dañs , hag all) ? Hag en ho soñj emañ luskiñ pe sikour krouidigezh ur bagad, ur c'helc'h, ur laz-soniñ hag all ?

Diaes eo deomp respont d'ar goulenn-se. N'eo ket d'un ti-kêr da sevel ar goulenn sokial. Respont dezhañ ne lavaromp ket. Met lakaet 'vo war wel ganeomp evel bep kevredigezhioù.

11 – Ma voc'h dilennet, hag harpiñ a raoc'h savidigezh un Ti ar Vro e Bro an Oriant ?

Ya. Ar goulenn-se zo bet graet adalek bloavezhioù. Bro an Oriant en deus dale war ar sujed-se. Pep tra zo digor. Netra ispisial zo bet raktreset ganeomp neuze hon eus c'hoant sevel ar raktrès asambles gant ar gevredigezhioù breizhat. Kouslkoude eo ur point pouezus evidomp.

12 – Doc'h ho soñj, hag e rank bout lakaet ar sevenadur edan karg barregezhioù ar Gumuniezh tolpad kêrioù pe ar Gumuniezh kumunioù

Evit ul lod ya. Ar brezhoneg n'eo ket un dra eus an Oriant met eus Breizh dre-vraz. Liammet a dlefe bezañ ar gevredigezhioù etre ar c'humunioù. Ha mat 'vefe gwelout raktresoù bodet.

13 – Petra eo ho soñj diàr-benn adunvaniezh Breizh ?

A-du emañ hor skipailh evit ma 'vefe savet ur referendum. Evit ur bern tud 'barzh hol listenn eo anat. Evit tud all n'eo ket un dra anevzet mat. Prest e vefemp evit sevel un het evit soutenn ar referendum. 'Pezh zo sur eo hon eus c'hoant sevel liammoù etre An Oriant hag Sant Nazer ha Naoned. Anat eo e keñver plas ar mor amañ. Diposubl eo sevel ur strategiezh evit ar porzhioù hep kenlabourat gant porzh brasañ Breizh ! Gevelliñ An Oriant ha Sant Nazer a blijfe deomp ivez evit ma vefe kresket hol liammoù sevenadurel, ekonomikel ha sokial.

Ho trugarekaat a raomp evit an amzer a vo tremenet genoc'h evit respont d'ar c'houlennaoueg-mañ.

Gellet a rit kas deomp ho respontoù dre mail (elections@ebo.bzh) pe dre lizher, d'ar chomlec'h-mañ, **a-raok ar 25 a viz C'hwevrer**.

Emglev Bro An Oriant

Ti ar C'hevredadoù– 12 straed Colbert, 16P – 56100 AN ORIENT